

CARNAVAL 60 *Alegria y Fantasia*



Curiosonan Arubiano

ORANJESTAD – No tin un miho luga pa busca informacion cu ta na Archief Nacional Aruba. Prome cu tabata tin otro tipo di seguro, manera AZV, pero prome cu e tempo ey, unda nos hendenan ta bay dokter of hospital ora nan bira malo? Y con e gastonan medico of tratamiento tabata wordo cubri?

HISTORIA

Prome cu tabata tin dokter na Aruba, e curiosonan tabata cura hende. Nan tabata cura hende y tambe boticario. Na 1910 tabata tin 1 dokter so na Aruba, esta dokter Horacio Eulogio Oduber, pa mas of menos 9500 habitante.

Awendia nos ta conta cu mas of menos 200 dokter y especialista riba diferente ramo y dentista pa mas of menos 110.000 habitante.

E tempo ey e curiosonan tabata ehecuto un rol hopi grandi banda di e solo dokter ey. Despues poco poco e dokternan a cuminsa domina, hasta a bin ley cu ta limita e curiosonan pa uza nan “don”. E cantidad di curiosonan awendia ta masha limita, pero nan a laga nan herencia atras den forma di remedi di tera cu te dia di awe ta wordo hopi uza. Manera stropi calbas, hor garganta cu seida, foyo di carpata pa baha hinchia, rabo di cabay pa haci e organonan limpi y hopi mas.

ACTIVIDADNAN DI UN CURIOSO

Ora cu e descendientenan di un curioso Arubano ta referi na e actividad di un curioso, nan ta splica cu ta trata di hendenan cu a haya un “don” di Dios, pa traha yerba, pa hala

y resa cu hende, pa asina cura nan. Un curioso no ta cobra. Si bo kier, bo por dun’e algo. Tin curioso cu ta hasta duna bo loke cu e tin, si bo ta un hende den necesidad.

DIAGNOSTICO Y TRATAMENDO DI UN CURIOSO

Un curioso su manera di biba ta otro compara cu otro ciudadanonan. Nan ta resa hopi, tin cu tin nan santo cu e ta traha cun’e. Nan ta pidi mata y traha remedi cu un proceso special. Nan ta trata y cura entre otro: tosamento, diferente forma di malo di stoma, malo di garganta, cacheton, bruela, sarampi, banda, problema di matriz y diferente otro malesa cu hendenan tabata tin. E tempo ey no tabata tin antibiotica of vacuna manera awendia.



Tratamento tabata por a dura tin biaha largo, hasta tratamiento psiquiatrico. E cas di e curioso tabata fungi manera un clinica dor cu tin biaha e pashent tin cu keda cerca e curioso te ora e bira bon cu e por bay su cas.

Un danki grandi ta bay na e revista Pulso di e Organo Ehecutivo AZV como tambe Archief Nacional Aruba pa por a comparti e informacion di nos curiosonan di antes. Na e manera aki nos ta mantene nos reinan bibo. □